

述卜筮星相學卷七

潤德堂叢書之五

鎮江袁樹珊纂述

通卜筮星相學有得廟享者

許楊

後漢書方術傳云。許楊字偉君。汝南平輿人也。少好術數。王莽輔政。召爲郎。稍遷酒泉都尉。及莽篡位。楊乃變姓名爲巫醫。逃匿它界。莽敗。方還鄉里。汝南舊有鴻郤陂。成帝時。丞相翟方進奏毀敗之。建武中。太守鄧晨欲修復其功。聞楊曉水脈。召與議之。楊曰。昔大禹決江疎河。以利天下。明府今興立廢業。富國安民。誠願以死效力。晨大悅。因署楊爲都水掾。使典其事。楊因高下形勢。起塘四百餘里。數年乃立。百姓得其便。累歲大稔。楊後以病卒。晨於都宮爲楊起廟。圖畫形像。百姓思其功績。皆祭祀之。

高獲

後漢書方術傳云。高獲字敬公。汝南新息人也。爲人尼首方面。少遊學京

師與光武有舊。師事司徒歐陽歙。歙下獄當斷。獲冠鐵冠。帶鐵鎖。詣闕請
歙。帝雖不赦而引見之。謂曰。敬公。朕欲用子爲吏。宜改常性。獲對曰。臣受
性於父母。不可改之於陛下。出便辭去。三公爭辟不應。後太守鮑昱請獲。
既至門。令主簿就迎。主簿曰。但使騎吏迎之。獲聞之。卽去。昱遣追請。獲。
顧曰。府君但爲主簿所欺。不足與談。遂不留。時郡境大旱。獲素善天文。曉
遁甲。能役使鬼神。昱自往問。何以致雨。獲曰。急罷三部督郵。明府當自北
出。到三十里亭。雨可致也。昱從之。果得大雨。每行縣。輒軾其閭。獲遂遠遁。
江南。卒於石城。石城人思之。共爲立祠。

通卜筮星相學有爲名臣者

王景

後漢書循吏傳云。王景字仲通。樂浪謁邯人也。少學易。遂廣闢衆書。又好
天文術數之事。沈深多伎藝。辟司空。伏恭府時。有薦景能理水者。顯宗詔
與將作謁者王吳共修作浚儀渠。吳用景攜流法。水乃不復爲害。後汴渠

東侵。日月彌廣。而水門故處。皆在河中。兗豫百姓怨歎。以爲縣官恆興佗役。不先民急。永平十二年。議修汴渠。乃引見景。問以理水形便。景陳其利害。應對敏給。帝善之。又以嘗修浚儀。功業有成。乃賜景山海經。河渠書。禹貢圖。及錢帛衣物。夏遂發卒數十萬。遣景與王吳修渠築隄。自滎陽東至千乘海口千餘里。景乃商度地勢。鑿山阜。破砥績。直截溝澗。防遏衝要。疎決壅積。十里立一水門。令更相洄注。無復潰漏之患。景雖簡省役費。然猶以百億計。明年夏渠成。帝親自巡行。詔濱河郡國。置河隄員吏。如西京舊制。景由是知名。王吳及諸從事掾吏。皆增秩一等。景三遷爲侍御史。十五年從駕東巡狩至無鹽。帝美其功績。拜河堤謁者。賜車馬縑錢。建初七年。遷徐州刺史。先是杜陵杜篤奏上論遷都。欲令車駕遷還長安。耆老聞者。皆動懷土之心。莫不眷然佇立西望。景以宮廟已立。恐人情疑惑。會時有神雀諸瑞。乃作金人論。頌洛邑之美。天人之符。文有可採。明年遷廬江太守。先是百姓不知牛耕。致地力有餘。而食常不足。郡界有楚相孫敖所起

芍陂稻田。景乃驅率吏民。修起蕪廢。教用墾耨。由是墾闢倍多。境內豐給。遂銘石刻誓。令民知常禁。又訓令蠶織。爲作法制。皆著于鄉亭。廬江傳其文辭。卒于官。初景以爲六經所載。皆有卜筮。作事舉止。質於蓍龜。而衆書錯糅。吉凶相反。乃參紀衆家數術文書。家宅禁忌。堪輿日相之屬。適於事用者。集於大衍玄基云。

任文公

後漢書方術傳云。任文公。巴郡閬中人也。父文孫。明曉天官風角秘要。文公少修父術。州辟從事。哀帝時有言。越雋太守欲反。刺史大懼。遣文公等五從事。檢行郡界。潛伺虛實。共止傳舍。時暴風卒至。文公遽起。白諸從事。促去。當有逆變來害人者。因起駕速驅。諸從事未能自發。郡果使兵殺之。文公獨得免。後爲治中從事。時天旱。白刺史曰。五月一日。當有大水。其變已至。不可防救。宜令吏人豫爲其備。刺史不聽。文公獨儲大船。百姓或聞。頗有爲防者。到其日旱烈。文公急命促載。使白刺史。刺史笑之。日將中天。

北雲起。須臾大雨。至舖時。湔水湧起十餘丈。突壞廬舍。所害數千人。文公遂以占術馳名。辟司空掾。平帝卽位。稱疾歸家。

謝夷吾

又云。謝夷吾。字堯卿。會稽山陰人也。少爲郡吏。學風角占候。太守第五倫擢爲督郵。時烏程長有臧豎倫。使收案其罪。夷吾到縣。無所驗。但望閣伏哭而還。一縣驚怪。不知所爲。及還。白倫曰。竊以占候知長當死。近至十日。遠不過六十日。遊魂假息。非刑所加。故不收之。倫聽其言。至月餘。果有驛馬齎長印綬。上言暴卒。倫以此益禮信之。舉孝廉。爲壽張令。稍遷荊州刺史。遷鉅鹿太守。所在愛育人物。有善績。及倫作司徒令。班固爲文薦夷吾。疏中有願乞骸骨。更授夷吾。上以光七曜之明。下以厭率土之望。庶令微臣塞咎。免悔云云。

東漢書方術傳所載在仕路者之史略

文獻通考云。東漢書方術傳所載在仕路者。任文公善天官風角。仕至司

空掾。郭憲善術。仕至光祿勳。許楊善術。曉水脈。仕至都水掾。王喬有神術。仕至縣令。謝夷吾善風角。仕至太守。李郃善河洛風星。以孝廉舉。仕至司徒。樊英善風角。算河洛七緯。推步災異。以隱士聘。仕至光祿大夫。公沙穆善河洛步推之術。仕至弘農令。單颺善天官算術。仕至漢中太守。韓說善圖緯。仕至江夏太守。

馬端臨曰。史所載兩漢士大夫。明方術。善技藝。而在仕途。有至大官者。如衛綰。周仁。吾邱壽王。則假方術以進。而自他有文行。以取顯貴者也。如李郃。樊英之徒。則雖善方術。而本不假此以進身取位者也。然考東漢書方術傳所載。則終身肥遁。不求聞達者甚多。有不應辟舉者。有變姓名。不知所終者。眞賢士也。其與後世之以一伎自名。而奔走形勢之塗。以爲干名徇利之階者。大有逕庭矣。

又云。中宗神龍元年。太白山人鄭普思。以方術除秘書監。其年又除方術人葉靜能爲國子祭酒。

李淳風

唐書方技傳云。李淳風。岐州雍人。父播。仕隋高唐尉。棄官爲道士。號黃冠子。以論譔自見。淳風幼爽秀。通羣書。明步天歷算。貞觀初。與傅仁均。爭歷法。議者多附淳風。故以將仕郎直太史局。制渾天儀。詆撫前世得失。著法象書七篇。上之。擢承務郎。遷太常博士。改太史丞。與諸儒脩書。遷爲令。太宗得秘識。言唐中弱。有女武代王。以問淳風。對曰。其兆旣成。已在宮中。又四十年而王。王而肅唐子孫且盡。帝曰。我求而殺之。奈何。對曰。天之所命。不可去也。而王者果不死。徒使疑似之戮。淫及無辜。且陛下所親愛。四十年而老。老則仁。雖受終易姓。而不能絕唐。若殺之復生壯者。多殺而逞。則陛下子孫無遺種矣。帝采其言止。淳風占候吉凶。若節契然。當世術家。意有鬼神相之。非學習可致。終不能測也。以勞封昌樂縣。

通卜筮星相學有毀家濟人者

折像

後漢書方術傳云。折像。字伯式。廣漢雒人也。其先張江者。封折侯。曾孫國。爲鬱林太守。徙廣漢。因封氏焉。國生像。國有貲財二億。家僮八百人。像幼有仁心。不殺昆蟲。不折萌芽。能通京氏易。好黃老言。及國卒。感多藏厚亡之義。乃散金帛資產。周施親疎。或諫像曰。君三男兩女。孫息盈前。當增益產業。何爲坐自殫竭乎。像曰。昔鬬子文有言。我乃避禍。非避富也。吾門戶殖財日久。盈滿之咎。道家所忌。今世將衰。子又不才。不仁而富。謂之不。幸。牆隙而高。其崩必疾也。智者聞之。咸服焉。自知亡日。召賓客九族。飲食辭訣。忽然而終。時年八十四。家無餘資。諸子衰劣如其言云。

廖扶

又云。廖扶。字文起。汝南平輿人也。習韓詩。歐陽尚書。教授常數百人。父爲北地太守。永初中。坐羌沒郡。下獄死。扶感父以法傷身。憚爲吏。及暇終而歎曰。老子有言。名與身孰親。吾豈爲名乎。遂絕志世外。專精經典。尤明天文。讖緯。風角。推步之術。州郡公府辟召。皆不應。就問災異。亦無所對。扶逆。

知歲荒。乃聚穀數千斛。悉用給宗族姻親。又斂葬遭疫死亡。不能自收者。常居先人冢側。未曾入城市。太守謁煥。先爲諸生從扶學。後臨郡。未到。先遣吏修門人之禮。又欲擢扶子弟。固不肯。當時人因號爲北郭先生。年八十。終於家。二子孟舉。偉舉。並知名。

通卜筮星相學。有列傳逸民者。

嚴君平

通志隱逸傳云。嚴遵。字君平。

一云名尊。

蜀人也。君平隱居不仕。卜筮於成都市。

以爲卜筮者。賤業。而可以惠衆。人有邪惡。非正之問。則依蓍龜爲言。利害。

與人子言。依於孝。與人弟言。依於順。與人臣言。依於忠。各因勢導之。以善。

從吾言者。已過半矣。裁日閱數人。得百錢足自養。則閉肆垂簾。而授老子。

博覽無不通。依老子嚴周之指。著書十餘萬言。楊雄少時從游學。已而仕。

京師顯名。數爲朝廷在位賢者。稱君平德。杜陵李彊素善雄。久之爲益州。

牧。喜謂雄曰。吾得嚴君平爲從事。足矣。雄曰。君備禮以待之。彼人可見而。

不可得詘也。彊心以爲不然。及至蜀。致禮與相見。卒不敢言以爲從事。乃歎曰。楊子雲誠知人也。君平年九十餘。遂以其業終。蜀人愛敬。至今稱焉。班固前漢書王貢兩龔鮑傳云。鄭子真。嚴君平。皆未嘗仕。然其風聲足以激貪厲俗。近古之逸民也。

鄭樵通典按類說云。蜀有富人羅冲者。問君平曰。君何以不仕。君平曰。無以自發。冲爲君平具車馬衣糧。君平曰。吾病耳。非不足也。我有餘而子不足。奈何以不足奉有餘。冲曰。吾有萬金。子無儋石。乃云有餘。不亦謬乎。君平曰。不然。吾前宿子家。人定而役未息。晝夜汲汲。未嘗有足。今我以卜爲業。不下牀而錢自至。猶餘數百。塵埃厚寸。不知所用。此非我有餘而子不足耶。冲大慚。君平歎曰。益我貨者。損我神。生我名者。殺我身。竟不仕。王右軍十七帖云。嚴君平。司馬相如。揚子雲。皆有後否。

鮑參軍集蜀四賢詠云。君平因世閒。得還守寂寞。閉簾著道德。開卦述天爵。

全唐文載李華贊嚴君平云。先生冥冥。隱於卜肆。宗師老氏。精究易義。爰
衣爰食。止足非利。垂簾燕居。默養真氣。誨人不倦。人悅其風。噉味柔剛。在
我域中。心與世遠。事與人同。不臣大君。不友上公。在貴反賤。齊明若蒙。遼
哉遠哉。微妙元通。弋者何爲。仰簞飛鴻。

珊按。蜀四賢者。司馬相如。嚴君平。王褒。揚雄是也。茲篇僅錄詠君平詩
一則。讀之如見其人。再證以王右軍十七帖。詢君平有後否一語。及李
華贊君平止足非利。誨人不倦云云。則君平之高風亮節。令人崇拜更
可知矣。

顧歡

南齊書高逸傳云。顧歡。字景怡。吳郡鹽官人也。祖起。晉隆安末。避亂徙居。
歡年六七歲。畫甲子有簡三篇。歡析計。遂知六甲。家貧。父使驅田中雀。歡
作黃雀賦而歸。雀食過半。父怒欲撻之。見賦乃止。鄉中有學舍。歡貧。無以
受業。於舍壁後倚聽。無遺忘者。八歲誦孝經詩論。及長。篤志好學。母年老。

躬耕誦書。夜則燃糠自照。同郡顧覲之臨縣。見而異之。遣諸子與遊。及孫
憲之。並受經句。歡年二十餘。更從豫章雷次宗。諮玄儒諸義。母亡。水漿不
入口六七日。廬於墓次。遂隱遁不仕。於剡天台。開館聚徒。受業者常近
百人。歡早孤。每讀詩至哀哀父母。輒執書慟泣。學者由是廢蓼莪篇不復
講。太祖輔政。悅歡風教。徵爲揚州主簿。遣中使迎歡。及踐阼。乃至。歡稱山
谷臣。顧歡上表。中有臣志盡幽深。無與榮勢。自足雲霞。不須祿養。陛下既
遠見尋求。敢不盡言。言既盡矣。請從此退。永明元年。詔徵歡爲太學博士。
同郡顧黯爲散騎郎。黯字長孺。有隱操。與歡俱不就徵。歡晚節服食。不與
人通。每旦出戶。山鳥集其掌取食。事黃老。道解陰陽。書爲數術。多效驗。初
元嘉末。出都。寄住東府。忽題柱云。三十年二月二十一日。因東歸。後太初
弑逆。果是此年月。自知將終。賦詩言志云。精氣因天行。遊魂隨物化。尅死
日。卒於剡山。身體柔輒。時年六十四。還葬舊墓。木連理出墓側。縣令江山
圖表狀。世祖詔歡諸子。撰歡文議三十卷。

通卜筮星相學有品端學粹者

郎宗子顓

後漢書列傳云郎顓字雅光北海安丘人也父宗字仲綏學京氏易善風

角星算六日七分

京氏京房也作易傳風角星算謂善天文算數也易稽覽圖曰甲子卦氣起

中孚六日八十分日之七也八十分爲一日之七者一卦六日七分也

鄭玄注云六以候能望氣占候吉凶常賣卜自

奉音扶用反

安帝徵之對策爲諸儒表後拜吳令

吳縣名屬會稽郡今蘇州縣也

時卒有暴

風宗占知京師當有大火記識時日遣人參候果如其言諸公聞而表上以博士徵之宗恥以占驗見知聞徵書到夜縣印綬於縣廷而遁去遂終身不仕顓少傳父業兼明經典隱居海畔延致學徒常數百人晝研精義夜占象度勤心銳思朝夕無倦州郡辟召舉有道方正不就

俞直

江西通志云俞直玉山人於河洛易象之旨無不求其義而爲說秦檜欲館置直謝不就紹興辛巳金人亂淮用事者遣使問退敵之期言皆切中

卒不以術自炫。

蕭才夫

圖書集成引宋文信國公贈人鑑。蕭才夫談命文云。歲單閼。人鑑蕭才夫過予。以予命推之。言頗悉。是秋迄次年。予所遭無有不與其言相符。噫。人鑑其神已。爲之辭曰。眇陰陽之大化兮。布濩垓埏。出王游衍之度思兮。曾淺淺乎爲天。自青紫食窮經之心兮。怪詭乘之而相撓。掠王緯之膚兮。誑其愚以自賢。方疾其拂耳。驛心兮。羌作炳於眇綿。將事實與行會兮。抑挾幽而鈎元。予將窺前靈之逸跡兮。就有道而正焉。

宋文天祥字宋瑞號文山吉水人圭作

葉子仁

廣信府志云。葉子仁。上饒人。推算筮占。往往如破的。歲乙酉。真文忠方在班。子仁以書勸補外。甚力。未幾。果去國。子仁每推論五行。輒以善道勉人。如孝弟忠信。清心寡慾等語。未嘗不懇切言之。真文忠以爲君平之風。贈以絕句云。易象推占妙入神。惟有南陽賣卜人。見真文忠集。

宋真德秀字景元浦

城人。世稱西山先生。諡文忠。

王奇

天台縣志云。王奇。字世英。性介直。初爲邑庠生。不偶。去而游京師。遍歷江湖。以星命占筮之術。稱於人。言禍福輒應。自以數奇。不受室。以姪宗元爲嗣。年八十而終於京師。時館人以事坐誣繫獄。奇爲直之。其妻招夜飲。閉門不赴。明日徙去。人以爲難。無錫邵尙書。二臬司。深愛重之。爲志其墓。

劉興漢

寶慶府志云。劉興漢。字思吾。邵陽人。工日者術。士大夫多與之游。監司郡邑。以冠帶給之。額旌無虛日。然雖飭星卜。每與人言。必以修命造命。是訓是行。盈戶牖。皆格言。嘗識一友於貧賤時。隨成顯宦。視之如三黨者二十年。孤介之性。決無一事相干。後其家敗。戚友多受累者。獨超然事外。惟雅好讀書。督課二子不少姑息。後先俱游泮。苦志早卒。漢好善益力。以老且孤。歷變亂八十餘考終。

高平川

延安府志云。高平川。永安人。精星術。得雲谷道人斷袁了凡意。葉臺山。李九五二公微時。川與語。二公駭之。已而二公入相。言皆驗。每憐其貧。諷令以子小。就一職爲祿養。川曰。寧日不再食。勿以薄分辱名器也。李益重之。年八十。卒於郡郊。四鶴橋。不能舉殯。適葉馳驛至。爲賻喪具。

陳佐明

揚州府志云。陳君佐明。江都人。善方脈。洪武初。爲御醫。永樂間。棄官。著黃冠。市藥武當山中。以易卜人吉凶。多奇中。卒葬山中石穴。

歷代太史令欽天監必須兼通卜筮星相學者

「自鳳鳥氏爲歷正。至清欽天監其職務大致相同」

通典云。太史局令。昔少皞以鳥名官。其鳳鳥氏爲歷正。至顓頊。命南正重以司天。北正黎以司地。唐虞之際。羲氏和氏紹重黎之後。代序天地。夏有太史終古者。當桀之暴。知其將亡。乃執其圖法。而奔於殷。殷太史高勢見